

四庫全書

經部

欽定四庫全書

經部

四書或問卷三至五

詳校官監察御史<sub>臣</sub>左周

刑部郎中<sub>臣</sub>許兆椿覆勘

總校官編修臣王燕緒

校對官修撰臣戴衡亨

謄錄監生臣趙果

欽定四庫全書

四書或問卷三

宋 朱子 撰

中庸

或問名篇之義程子專以不偏為言呂氏專以無過不及為說二者固不同矣子乃合而言之何也曰中一名而有二義程子固言之矣今以其說推之不偏不倚云者程子所謂在中之義未發之前無所偏倚之

名也無過不及者程子所謂中之道也見諸行事各得其中之名也蓋不偏不倚猶立而不近四旁心之體地之中也無過不及猶行而不先不後理之當事之中也故於未發之大本則取不偏不倚之名於已發而時中則取無過不及之義語固各有當也然方其未發雖未有無過不及之可名而所以為無過不及之本體實在於是及其發而得中也雖其所主不能不偏於一事然其所以無過不及者是乃無偏倚

者之所為而於一事之中亦未嘗有所偏倚也故程子又曰言和則中在其中言中則含喜怒哀樂在其中而呂氏亦云當其未發此心至虛無所偏倚故謂之中以此心而應萬事之變無往而非中矣是則二義雖殊而實相為體用此愚於名篇之義所以不得取此而遺彼也曰庸字之義程子以不易言之而子以為平常何也曰唯其平常故可常而不可易若驚世駭俗之事則可暫而不得為常矣二說雖殊其致

一也但謂之不易則必要於久而後見不若謂之平常則直驗於今之無所詭異而其常久而不可易者可兼舉也況中庸之云上與高明為對而下與無忌憚者相反其曰庸德之行庸言之謹又以見夫雖細微而不敢忽則其名篇之義以不易而為言者又孰若平常之為切乎曰然則所謂平常將不為淺近苟且之云乎曰不然也所謂平常亦曰事理之當然而無所詭異云爾是固非有甚高難行之事而亦豈同

流合汙之謂哉既曰當然則自君臣父子日用之常  
推而至於堯舜之禪授湯武之放伐其變無窮亦無  
適而非平常矣曰此篇首章先明中和之義次章乃  
及中庸之說至其名篇乃不曰中和而曰中庸者何  
哉曰中和之中其義雖精而中庸之中實兼體用且  
其所謂庸者又有平常之意焉則比之中和其所該  
者尤廣而於一篇大指精粗本末無所不盡此其所  
以不曰中和而曰中庸也曰張子之言如何曰其曰

須句句理會使其言互相發明者眞讀書之要法不  
但可施於此篇也曰呂氏為己為人之說如何曰為  
人者程子以為欲見知於人者是也呂氏以志於功  
名言之而謂今之學者未及乎此則是以為人為及  
物之事而涉獵倣倖以求濟其私者又下此一等也  
殊不知夫子所謂為人者正指此下等人爾若曰未  
能成己而遽欲成物此特可坐以不能知所先後之  
罪原其設心猶愛而公視彼欲求人知以濟一己之



私而後學者不可同日語矣至其所謂立喜怒哀樂未發之中以為之本使學者擇善而固執之者亦曰欲使學者務先存養以為窮理之地耳而語之未瑩乃似聖人強立此中以為大本使人以是為準而取中焉則中者豈聖人之所強立而未發之際亦豈若學者有所擇取於其間哉但其全章大指則有以切中今時學者之病覽者誠能三復而致思焉亦可以感悟而興起矣

第一章至第十一章

或問天命之謂性率性之謂道修道之謂教何也曰此  
先明性道教之所以名以見其本皆出乎天而實不  
外於我也天命之謂性言天之所以命乎人者是則  
人之所以為性也蓋天之所以賦與萬物而不能自  
已者命也吾之得乎是命以生而莫非全體者性也  
故以命言之則曰元亨利貞而四時五行庶類萬化  
莫不由是而出以性言之則曰仁義禮智而四端五

典萬物萬事之理無不統於其間蓋在天在人雖有性命之分而其理則未嘗不一在人在物雖有氣稟之異而其理則未嘗不同此吾之性所以純粹至善而非若荀揚韓子之所云也率性之謂道言循其所得乎天以生者則事事物物莫不自然各有當行之路是則所謂道也蓋天命之性仁義禮智而已循其仁之性則自父子之親以至於仁民愛物皆道也循其義之性則自君臣之分以至於敬長尊賢亦道也

循其禮之性則恭敬辭讓之節文皆道也循其智之性則是非邪正之分別亦道也蓋所謂性者無一理之不具故所謂道者不待外求而無所不備所謂性者無一物之不得故所謂道者不假人為而無所不周雖鳥獸草木之生僅得形氣之偏而不能有以通貫乎全體然其知覺運動榮悴開落亦皆循其性而各有自然之理焉至於虎狼之父子蜂蟻之君臣豺獺之報本睢雄之有別則其形氣之所偏又反有以

存其義理之所得尤可以見天命之本然初無間隔而所謂道者亦未嘗不在是也是豈有待於人為而亦豈人之所得為哉修道之謂教言聖人因是道而品節之以立法垂訓於天下是則所謂教也蓋天命之性率性之道皆理之自然而人物之所同得者也人雖得其形氣之正然其清濁厚薄之稟亦有不能不異者是以賢知者或失之過愚不肖者或不能及而得於此者亦或不能無失於彼是以私意人欲或

生其間而於所謂性者不免有所昏蔽錯雜而無以全其所受之正性有不全則於所謂道者因亦有所乖戾舛逆而無以適乎所行之宜惟聖人之心清明純粹天理渾然無所虧闕故能因其道之所在而為之品節防範以立教於天下使夫過不及者有以取中焉蓋有以辨其親疏之殺而使之各盡其情則仁之為教立矣有以別其貴賤之等而使之各盡其分則義之為教行矣為之制度文為使之有以守而不

失則禮之為教得矣為之開導禁止使之有以別而  
不差則知之為教明矣夫如是是以人無知愚事無  
大小皆得有所持循據守以去其人欲之私而復乎  
天理之正推而至於天下之物則亦順其所欲達其  
所惡因其材質之宜以致其用制其取用之節以遂  
其生皆有政事之施焉此則聖人所以財成天地之  
道而致其彌縫輔贊之功然亦未始外乎人之所受  
乎天者而強為之也子思以是三言著於篇首雖曰

姑以釋夫三者之名義然學者能因其所指而反身以驗之則其所知豈獨名義之間而已哉蓋有得乎天命之說則知天之所以與我者無一理之不備而釋氏之所謂空者非性矣有以得乎率性之說則知我之所得乎天者無一物之不該而老氏之所謂無者非道矣有以得乎修道之說則知聖人之所以教我者莫非因其所固有而去其所本無背其所至難而從其所甚易而凡世儒之訓詁詞章管商之權謀



功利老佛之清淨寂滅與夫百家衆技之支離偏曲  
皆非所以為教矣由是以往因其所固有之不可昧  
者而益致其學問思辨之功因其所甚易之不能已  
者而益致其持守推行之力則夫天命之性率性之  
道豈不昭然日用之間而修道之教又將由我而後  
立矣曰率性修道之說不同孰為是耶曰程子之論  
率性正就私意人欲未萌之處指其自然發見各有  
條理者而言以見道之所以得名非指修為而言也

呂氏良心之發以下至安能致是一節亦甚精密但謂人雖受天地之中以生而梏於形體又為私意小知所撓故與天地不相似而發不中節必有以不失其所受乎天者然後為道則所謂道者又在修為之後而反由教以得之非復子思程子所指人欲未萌自然發見之意矣游氏所謂無容私焉則道在我楊氏所謂率之而已者似亦皆有呂氏之病也至於修道則程子養之以福修而求復之云却似未合子思

本文之意獨其一條所謂循此修之各得其分而引  
舜事以通結之者為得其旨故其門人亦多祖之但  
所引舜事或非論語本文之意耳呂氏所謂先王制  
禮達之天下傳之後世者得之但其本說率性之道  
處已失其指而於此又推本之以為率性而行雖已  
中節而所稟不能無過不及若能心誠求之自然不  
中不遠但欲達之天下傳之後世所以又當修道而  
立教焉則為太繁複而失本文之意耳改本又以時

位不同為言似亦不親切也曰楊氏所論王氏之失如何曰王氏之言固為多病然此所云天使我有是者猶曰上帝降衷云爾豈真以為有或使之者哉其曰在天為命在人為性則程子亦云而楊氏又自言之蓋無悖於理者今乃指為王氏之失不惟似同浴而譏裸裎亦近於意有不平而反為至公之累矣且以率性之道為順性命之理文意亦不相似若游氏以適天倍情為非性則又不若楊氏人欲非性之云

也曰然則呂游楊侯四子之說孰優曰此非後學之所敢言也但以程子之言論之則於呂稱其深潛縝密於游稱其穎悟溫厚謂楊不及游而亦每稱其穎悟謂侯生之言但可隔壁聽今且熟復其言究覈其意而以此語證之則其高下淺深亦可見矣過此以往則非後學所敢言也

或問既曰道也者不可須臾離也可離非道也是故君子戒愼乎其所不睹恐懼乎其所不聞矣而又曰莫

見乎隱莫顯乎微故君子慎其獨也何也曰此因論率性之道以明由教而入者其始當如此蓋兩事也其先言道不可離而君子必戒謹恐懼乎其所不睹不聞者所以言道之無所不在無時不然學者當無須臾毫忽之不謹而周防之以全其本然之體也又言莫見乎隱莫顯乎微而君子必慎其獨者所以言隱微之間人所不見而已獨知之則其事之纖悉無不顯著又有甚於他人之知者學者尤當隨其念之

方萌而致察焉以謹其善惡之幾也蓋所謂道者率性而已性無不有故道無不在大而父子君臣小而動靜食息不假人力之為而莫不各有當然不易之理所謂道也是乃天下人物之所共由充塞天地貫徹古今而取諸至近則常不外乎吾之一心循之則治失之則亂蓋無須臾之頃可得而暫離也若其可以暫合暫離而於事無所損益則是人力私智之所為者而非率性之謂矣聖人之所修以為教者因其

不可離者而品節之也君子之所由以為學者因其  
不可離者而持守之也是以日用之間須臾之頃持  
守工夫一有不至則所謂不可離者雖未嘗不在我  
而人欲間之則亦判然二物而不相管矣是則雖曰  
有人之形而其違禽獸也何遠哉是以君子戒慎乎  
其目之所不及見恐懼乎其耳之所不及聞瞭然心  
目之間常若見其不可離者而不敢有須臾之間以  
流於人欲之私而陷於禽獸之域若書之言防怨而



曰不見是圖禮之言事親而曰聽於無聲視於無形  
蓋不待其徵於色發於聲然後有以用其力也夫既  
已如此矣則又以謂道固無所不在而幽隱之間乃  
他人之所不見而已所獨見道固無時不然而細微  
之事乃他人之所不聞而已所獨聞是皆常情所忽  
以為可以欺天罔人而不必謹者而不知吾心之靈  
皎如日月既已知之則其毫髮之間無所潛遁又有  
甚於他人之知矣又況既有是心藏伏之久則其見

於聲音容貌之間發於行事施為之實必有暴著而不可掩者又不止於念慮之差而已也是以君子既戒懼乎耳目之所不及則此心常明不為物蔽而於此尤不敢不致其謹焉必使其幾微之際無一毫人欲之萌而純乎義理之發則下學之功盡善全美而無須臾之間矣二者相須皆反躬為己過人欲存天理之實事蓋體道之功莫有先於此者亦莫有切於此者故子思於此首以為言以見君子之學必由此

而入也曰諸家之說皆以戒慎不睹恐懼不聞即為  
謹獨之意子乃分之以為兩事無乃破碎支離之甚  
耶曰既言道不可離則是無適而不在矣而又言莫  
見乎隱莫顯乎微則是要切之處尤在於隱微也既  
言戒謹不睹恐懼不聞則是無處而不謹矣又言謹  
獨則是其所謹者尤在於獨也是固不容於不異矣  
若其同為一事則其為言又何必若是之重複耶且  
此書卒章潛雖伏矣不愧屋漏亦兩言之正與此相

首尾但諸家皆不之察獨程子嘗有不愧屋漏與謹獨是持養氣象之言其於二者之間特加與字是固已分為兩事而當時聽者有未察耳曰子又安知不睹不聞之不為獨乎曰其所不睹不聞者已之所不睹不聞也故上言道不可離而下言君子自其平常之處無所不用其戒懼而極言之以至於此也獨者人之所不睹不聞也故上言莫見乎隱莫顯乎微而下言君子之所謹者尤在於此幽隱之地也是其語

勢自相唱和各有血脈理甚分明如曰是兩條者皆為謹獨之意則是持守之功無所施於平常之處而專在幽隱之間也且雖免於破碎之譏而其繁複偏滯而無所當亦甚矣曰程子所謂隱微之際若與呂氏改本及游楊氏不同而子一之何耶曰以理言之則三家不若程子之盡以心言之則程子不若三家之密是固若有不同者矣然必有是理然後有是心有是心而後有是理則亦初無異指也合而言之亦

何不可之有哉曰他說如何曰呂氏舊本所論道不可離者得之但專以過不及為離道則似未盡耳其論天地之中性與天道一節最其用意深處然經文所指不睹不聞隱微之間者乃欲使人戒懼乎此而不使人欲之私得以萌動於其間耳非欲使人虛空其心反觀於此以求見夫所謂中者而遂執之以為應事之準則也呂氏既失其指而所引用不得於言必有事焉參前倚衡之語亦非論孟本文之意至謂

隱微之間有昭昭而不可欺感之而能應者則固心之謂矣而又曰正惟虛心以求則庶乎見之是又別以一心而求此一心見此一心也豈不誤之甚哉若楊氏無適非道之云則善矣然其言似亦有所未盡蓋衣食作息視聽舉動皆物也其所以如此之義理準則乃道也若曰所謂道者不外乎物而人在天地之間不能違物而獨立是以無適而不有義理之準則不可頃刻去之而不由則是中庸之旨也若便指

物以為道而曰人不能頃刻而離此百姓特日用而不知耳則是不惟昧於形而上下之別而墮於釋氏作用是性之失且使學者誤謂道無不在雖欲離之而不可得吾既知之則雖猖狂妄行亦無適而不為道則其為害將有不可勝言者不但文義之失而已也曰呂氏之書今有二本子之所謂舊本則無疑矣所謂改本則陳忠肅公所謂程氏明道夫子之言而為之序者子於石氏集解雖嘗辨之而論者猶或以



為非程夫子不能及也奈何曰是則愚嘗聞之劉李  
二先生矣舊本者呂氏大學講堂之初本也改本者  
其後所修之別本也陳公之序蓋為傳者所誤而失  
之及其兄孫幾叟具以所聞告之然後自覺其非則  
其書已行而不及改矣近見胡仁仲所記侯師聖語  
亦與此合蓋幾叟之師楊氏實與呂氏同出程門師  
聖則程子之內弟而劉李之於幾叟仁仲之於師聖  
又皆親見而親聞之是豈胸臆私見口舌浮辨所得

而奪哉若更以其言考之則二書詳略雖或不同然其語意實相表裏如人之形貌昔腴今瘠而其部位神采初不異也豈可不察而遽謂之兩人哉又況改本厭前之詳而有意於略故其詞雖約而未免反有刻露峭急之病至於詞義之間失其本指則未能改於其舊者尚多有之按之明道平日之言平易從容而自然精切者又不啻硃硃之與美玉也於此而猶不辨焉則其於道之淺深固不問而可知矣

或問喜怒哀樂之未發謂之中發而皆中節謂之和中也者天下之大本也和也者天下之達道也致中和天地位焉萬物育焉何也曰此推本天命之性以明由教而入者其始之所發端終之所至極皆不外於吾心也蓋天命之性萬理具焉喜怒哀樂各有攸當方其未發渾然在中無所偏倚故謂之中及其發而皆得其當無所乖戾故謂之和謂之中者所以狀性之德道之體也以其天地萬物之理無所不該故曰

天下之大本謂之和者所以著情之正道之用也以其古今人物之所共由故曰天下之達道蓋天命之性純粹至善而具於人心者其體用之全本皆如此不以聖愚而有加損也然靜而不知所以存之則天理昧而大本有所不立矣動而不知所以節之則人欲肆而達道有所不行矣惟君子自其不睹不聞之前而所以戒謹恐懼者愈嚴愈敬以至於無一毫之偏倚而守之常不失焉則為有致其中而大本之

立日以益固矣尤於隱微幽獨之際而所以謹其善惡之幾者愈精愈密以至於無一毫之差謬而行之每不違焉則為有以致其和而達道之行日以益廣矣致者用力推致而極其至之謂致焉而極其至於靜而無一息之不中則吾心正而天地之心亦正故陰陽動靜各止其所而天地於此乎位矣動而無一事之不和則吾氣順而天地之氣亦順故充塞無間靡欣交通而萬物於此乎育矣此萬化之本原一

心之妙用聖神之能事學問之極功固有非始學所  
當議者然射者之的行者之歸亦學者立志之初所  
當知也故此章雖為一篇開卷之首然子思之言亦  
必至此而後已焉其指深矣曰然則中和果二物乎  
曰觀其一體一用之名則安得不二察其一體一用  
之實則此為彼體彼為此用如耳目之能視聽視聽  
之由耳目初非有二物也曰天地位萬物育諸家皆  
以其理言子獨以其事論然則自古衰亂之世所以

病乎中和者多矣天地之位萬物之育豈以是而失其常邪曰三辰失行山崩川竭則不必天翻地覆然後為不位矣兵亂凶荒胎殯卵殪則不必人消物盡然後為不育矣凡若此者豈非不中不和之所致而後又安可誣哉今以事言者固以為有是理而後有是事彼以理言者亦非以為無是事而徒有是理也但其言之不備有以啓後學之疑不若直以事言而理在其中之為盡耳曰然則當其不位不育之時豈無

聖賢生於其世而其所以致夫中和者乃不能有以救其一二何耶曰善惡感通之理亦及其力之所至而止耳彼達而在上者既曰有以病之則夫災異之變又豈窮而在下者所能救也哉但能致中和於一身則天下雖亂而吾身之天地萬物不害為安泰其不能者天下雖治而吾身之天地萬物不害為乖錯其間一家一國莫不皆然此又不可不知耳曰二者之為實事可也而分中和以屬焉將不又為破碎之



甚耶曰世固未有能致中而不足於和者亦未有能致和而不本於中者也未有天地已位而萬物不育者亦未有天地不位而萬物自育者也特據其效而推本其所以然則各有所從來而不可紊耳曰子思之言中和如此而周子之言則曰中者和也中節也天下之達道也乃舉中而合之於和然則又將何以為天下之大本也耶曰子思之所謂中以未發而言也周子之所謂中以時中而言也愚於篇首已辨之

矣學者涵泳而別識之見其並行而不相悖焉可也  
曰程呂問答如何曰考之文集則是其書蓋不完矣  
然程子初謂凡言心者皆指已發而言而後書乃自  
以為未當向非呂氏問之之審而不完之中又失此  
書則此言之未當學者何自而知之乎以此又知聖  
賢之言固有發端而未竟者學者尤當虛心悉意以  
審其歸未可執其一言而遽以為定也其說中字因  
過不及而立名又似併指時中之中而與在中之義

少異蓋未發之時在中之義謂之無所偏倚則可謂之無過不及則方此之時未有中節不中節之可言也無過不及之名亦何自而立乎又其下文皆以不偏不倚為言則此語者亦或未得為定論也呂氏又引允執厥中以明未發之旨則程子之說書也固謂允執厥中所以行之蓋其所謂中者乃指時中之中而非未發之中也呂氏又謂求之喜怒哀樂未發之時則程子所以答蘇李明之問又已有既思即是已

發之說矣凡此皆其決不以呂說為然者獨不知其於此何故略無所辨學者亦當詳之未可見其不辨而遽以為是也曰然則程子卒以赤子之心為已發何也曰衆人之心莫不有未發之時亦莫不有已發之時不以老稚賢愚而有別也但孟子所指赤子之心純一無偽者乃因其發而後可見若未發則純一無偽又不足以名之而亦非獨赤子之心為然矣是以程子雖改夫心皆已發之一言而以赤子之心為

已發則不可得而改也曰程子明鏡止水之云固以  
聖人之心為異乎赤子之心矣然則此其為未發者  
耶曰聖人之心未發則為水鏡之體既發則為水鏡  
之用亦非獨指未發而言也曰諸說如何曰程子備  
矣但其答蘇李明之後章記錄多失本真答問不相  
對值如耳無聞目無見之答以下文若無事時須見  
須聞之說參之其誤必矣蓋未發之時但為未有喜  
怒哀樂之偏耳若其目之有見耳之有聞則當愈益

精明而不可亂豈若心不在焉而遂廢耳目之用哉  
其言靜時既有知覺豈可言靜而引復以見天地之  
心為說亦不可曉蓋當至靜之時但有能知覺者而  
未有所知覺也故以為靜中有物則可而便以纔思  
即是已發為比則未可以為坤卦純陰而不為無陽  
則可而便以復之一陽已動為比則未可也所謂無  
時不中者所謂善觀者却於已發之際觀之者則語  
雖要切而其文意亦不能無斷續至於動上求靜之

云則問者又轉而之他矣其答動字靜字之問答敬何以用功之問答思慮不定之問以至若無事時須見須聞之說則皆精當但其曰當祭祀時無所見聞則古人之制祭服而設旒纁雖曰欲其不得廣視雜聽而致其精一然非以是為真足以全蔽其聰明使之一無見聞也若曰履之有絢以為行戒尊之有禁以為酒戒然初未嘗以是而遂不行不飲也若使當祭之時真為旒纁所塞遂如聾瞽則是禮容樂節皆

不能知亦將何以致其誠意交於鬼神哉程子之言  
決不如是之過也至其答過而不留之問則又有若  
不相值而可疑者大抵此條最多謬誤蓋聽他人之  
問而從旁竊記非唯未了答者之意而亦未悉問者  
之情是以致此亂道而誤人耳然而猶幸其間紕漏  
顯然尚可尋繹以別其偽獨微言之湮沒者遂不復  
傳為可惜耳呂氏此章之說尤多可疑如引屢空貨  
殖及心為甚者其於彼此蓋兩失之其曰由空而後



見夫中是又前章虛心以求之說也其不陷而入浮屠者幾希矣蓋其病根正在欲於未發之前求見夫所謂中者而執之是以屢言之而病愈甚殊不知經文所謂致中和者亦曰當其未發此心至虛如鏡之明如水之止則但當敬以存之而不使其小有偏倚至於事物之來此心發見喜怒哀樂各有攸當則又當敬以察之而不使其小有差忒而已未有如是之說也且曰未發之前則宜其不待著意推求而瞭然

心目之間矣一有求之之心則是便為已發固已不  
得而見之况欲從而執之則其為偏倚亦甚矣又何  
中之可得乎且夫未發已發日用之間固有自然之  
機不假人力方其未發本自寂然固無所事於執及  
其當發則又當即事即物隨感而應亦安得塊然不  
動而執此未發之中耶此為義理之根本於此有差  
則無所不差矣此呂氏之說所以條理紊亂援引乖  
刺而不勝其可疑也程子譏之以為不識大本豈不

信哉楊氏所謂未發之時以心驗之則中之義自見  
執而勿失無人欲之私焉則發必中節矣又曰須於  
未發之際能體所謂中其曰驗之體之執之則亦呂  
氏之失也其曰其慟其喜中固自若疑與程子所云  
言和則中在其中者相似然細推之則程子之意正  
謂喜怒哀樂已發之處見得未發之理發見在此一  
事一物之中各無偏倚過不及之差乃時中之中而  
非渾然在中之中也若楊氏之云中固自若而又引

莊周出怒不怒之言以明之則是以為聖人方當喜  
怒哀樂之時其心漠然同於木石而姑外示如此之  
形凡所云為皆不復出於中心之誠矣大抵楊氏之  
言多雜於佛老故其失類如此其曰當論其中否不  
當論其有無則至論也

或問此其稱仲尼曰何也曰首章夫子之意而子思言  
之故此以下又引夫子之言以證之也曰孫可以字  
其祖乎曰古者生無爵死無諡則子孫之於祖考亦

名之而已矣周人冠則字而尊其名死則諡而諱其名則固已彌文矣然未有諱其字者也故儀禮饋食之祝詞曰適爾皇祖伯某父乃直以字而面命之况孔子爵不應諡而子孫又不得稱其字以別之則將謂之何哉若曰孔子則外之之辭而又孔姓之通稱若曰夫子則又當時衆人相呼之通號也不曰仲尼而何以哉曰君子所以中庸小人之所以反之者何也曰中庸者無過不及而平常之理蓋天命人心之

正也唯君子為能知其在我而戒謹恐懼以無失其當然故能隨時而得中小人則不知有此而無所忌憚故其心每反乎此而不中不常也曰小人之中庸王肅程子悉加反字蓋疊上文之語然諸說皆謂小人實反中庸而不自知其為非乃敢自以為中庸而居之不疑如漢之胡廣唐之呂溫柳宗元者則其所謂中庸是乃所以為無忌憚也如此則不煩增字而理亦通矣曰小人之情狀固有若此者矣但以文勢

考之則恐未然蓋論一篇之通體則此章乃引夫子  
所言之首章且當略舉大端以分別君子小人之趨  
向未當遽及此意之隱微也若論一章之語脈則上  
文方言君子中庸而小人反之其下且當平解兩句  
之義以盡其意不應偏解上句而不解下句又遽別  
生他說也故疑王肅所傳之本為得其正而未必肅  
之所增程子從之亦不為無所據而臆決也諸說皆  
從鄭本雖非本文之意然所以發明小人之情狀則

亦曲盡其妙而足以警乎鄉原亂德之奸矣今存呂氏以備觀考他不能盡錄也

或問民鮮能久或以為民鮮能久於中庸之德而以下文不能期月守者證之何如曰不然此章方承上章小人反中庸之意而泛論之未遽及夫不能久也下章自能擇中庸者言之乃可責其不能久耳兩章各是發明一義不當遽以彼而證此也且論語無能字而所謂矣者又已然之辭故程子釋之以為民鮮有



此中庸之德則其與不能期月守者不同文意益明白矣曰此書非一時之言也章之先後又安得有次序乎曰言之固無序矣子思取之而著於此則其次第行列決有意味不應雜置而錯陳之也故凡此書之例皆文斷而意屬讀者先因其文之所斷以求本章之說徐次其意之所屬以考相承之序則有以各盡其一章之意而不失夫全篇之旨矣然程子亦有久行之說則疑出於其門人之所記蓋不能無差繆

而自世教衰之一條乃論語解而程子之手筆也諸家之說固皆不察乎此然呂氏所謂厭常喜新質薄氣弱者則有以切中學者不能固守之病讀者諷誦期月之章而自省焉則亦足以有警矣侯氏所謂民不識中故鮮能久若識得中則手動足履無非中者則其疎濶又益甚矣如曰若識得中則手動足履皆有自然之中而不可離則庶幾乎

或問此其言道之不行不明何也曰此亦承上章民鮮

能久矣之意也曰知愚之過不及宜若道之所以不  
明也賢不肖之過不及宜若道之所以不行也今其  
互言之何也曰測度深微揣摩事變能知君子之所  
不必知者知者之過乎中也昏昧蹇淺不能知君子  
之所當知者愚者之不及乎中也知之過者既惟知  
是務而以道為不足行愚者又不知所以行也此道  
之所以不行也刻意尚行驚世駭俗能行君子之所  
不必行者賢者之過乎中也卑污苟賤不能行君子

之所當行者不肖者之不及乎中也賢之過者既唯  
行是務而以道為不足知不肖者又不求所以知也  
此道之所以不明也然道之所謂中者是乃天命人  
心之正當然不易之理固不外乎人生日用之間特  
行而不著習而不察是以不知其至而失之耳故曰  
人莫不飲食也鮮能知味也知味之正則必嗜之而  
不厭矣知道之中則必守之而不失矣

或問此其稱舜之大知何也曰此亦承上章之意言如

舜之知而不過則道之所以行也蓋不自恃其聰明而樂取諸人者如此則非知者之過矣又能執兩端而用其中則非愚者之不及矣此舜之知所以為大而非他人之所及也兩端之說呂楊為優程子以為執持過不及之兩端使民不得行則恐非文意矣蓋當衆論不同之際未知其孰為過孰為不及而孰為中也故必兼總衆說以執其不同之極處而求其義理之至當然後有以知夫無過不及之在此而在所

當行若其未然則又安能先識彼兩端者之為過不及而不可行哉

或問七章之說曰此以上句起下句如詩之興耳或以二句各為一事言之則失之也

或問此其稱回之賢何也曰承上章不能期月守者而言如回之賢而不過則道之所以明也蓋能擇乎中庸則無賢者之過矣服膺弗失則非不肖者之不及矣然則茲賢也乃其所以為知也歟曰諸說如何曰

程子所引屢空張子所引未見其止皆非論語之本  
意唯呂氏之論顏子有曰隨其所至盡其所得據而  
守之則拳拳服膺而不敢失勉而進之則既竭吾才  
而不敢緩此所以恍惚前後而不可為象求見聖人  
之止欲罷而不能也此數言者乃為親切確實而足  
以見其深潛縝密之意學者所宜諷誦而服行也但  
求見聖人之止一句文義亦未安耳侯氏曰中庸豈  
可擇擇則二矣其務為過高而不顧經文義理之實

也亦甚矣哉

或問中庸不可能何也曰此亦承上章之意以三者之  
難明中庸之尤難也蓋三者之事亦知仁勇之屬而  
人之所難然皆必取於行而無擇於義且或出於氣  
質之偏事勢之迫未必從容而中節也若曰中庸則  
雖無難知難行之事然天理渾然無過不及苟一毫  
之私意有所未盡則雖欲擇而守之而擬議之間忽  
已墮於過與不及之偏而不自知矣此其所以雖若



甚易而實不可能也故程子以克己最難言之其旨  
深矣游氏以舜為絕學無為而楊氏亦謂有能斯有  
為之者其違道遠矣循天下固然之理而行其所無  
事焉夫何能之有則皆老佛之餘緒而楊氏下章所  
論不知不能為道遠人之意亦非儒者之言也二公  
學於程氏之門號稱高第而其言乃如此殊不可曉  
也已

或問此其記子路之問強何也曰亦承上章之意以明

擇中庸而守之非強不能而所謂強者又非世俗之所謂強也蓋強者力有以勝人之名也凡人和而無節則必至於流中立而無依則必至於倚國有道而富貴或不能不改其平素國無道而貧賤或不能久處乎窮約非持守之力有以勝人者其孰能及之故此四者汝子路之所當強也南方之強不及強者也北方之強過乎強者也四者之強強之中也子路好勇故聖人之言所以長其善而救其失者類如此曰

和與物同故疑於流而以不流為強中立本無所依  
又何疑於倚而以不倚為強哉曰中立固無所依也  
然凡物之情唯強者為能無所依而獨立弱而無所  
依則其不傾側而偃仆者幾希矣此中立之所以疑  
於必倚而不倚之所以為強也曰諸說如何曰大意  
則皆得之惟以矯為矯揉之矯以南方之強為矯哉  
之強與顏子之強以抑而強者為子路之強與北方  
之強者為未然耳

或問十一章素隱之說曰呂氏從鄭註以素為僚固有未安唯其舊說有謂無德而隱為素隱者於義略通又以遯世不見知之語反之似亦有據但素字之義與後章素其位之素不應頓異則又若有可疑者獨漢書藝文志劉歆論神仙家流引此而以素為索顏氏又釋之以為求索隱暗之事則二字之義既明而與下文行怪二字語勢亦相類其說近是蓋當時所傳本猶未誤至鄭氏時乃失之耳游氏所謂離人而

立於獨與夫未發有念之云皆非儒者之語也

四書或問卷三

欽定四庫全書

四書或問卷四

宋 朱子 撰

中庸

第十二章至第二十章

或問十二章之說曰道之用廣而其體則微密而不可見所謂費而隱也即其近而言之男女居室人道之常雖愚不肖亦能知而行之極其遠而言之則天下

之大事物之多聖人亦容有不盡知盡能者也然非獨  
聖人有所不知不能也天能生覆而不能形載地能形  
載而不能生覆至於氣化流行則陰陽寒暑吉凶災祥  
不能盡得其正者尤多此所以雖以天地之大而人猶  
有憾也夫自夫婦之愚不肖所能知行至於聖人天地  
之所不能盡道蓋無所不在也故君子之語道也其大  
至於天地聖人所不能盡而道無不包則天下莫能載  
矣其小至於愚夫愚婦之所能知能行而道無不體則



天下莫能破矣道之在天下其用之廣如此可謂費矣  
而其所用之體則不離乎此而有非視聽之所及者此  
所以為費而隱也子思之言至此極矣然猶以為不足  
以盡其意也故又引詩以明之曰鳶飛戾天魚躍于淵  
所以言道之體用上下昭著而無所不在也造端乎夫  
婦極其近小而言之察乎天地極其遠大而言也蓋夫  
婦之際隱微之間尤可見道不可離處知其造端乎此  
則其所以戒謹恐懼之實無不至矣易首乾坤而重咸

恒詩首闢睢而戒淫泆書記釐降禮謹大昏皆此意也  
曰諸說如何曰程子至矣張子以聖人為夷惠之徒既  
已失之又曰君子之道達諸天故聖人有所不知夫婦  
之智淆諸物故聖人有所不與則又析其不知不能而  
兩之皆不可曉也已曰諸家皆以夫婦之能知能行  
者為道之費聖人之所不知不能而天地有憾者為  
道之隱其於文義協矣若從程子之說則使章內專  
言費而不及隱恐其有未安也曰謂不知不能為隱

似矣若天地有憾鳶飛魚躍察乎天地而欲亦謂之  
隱則恐未然且隱之為言正以其非言語指陳之可  
及耳故獨舉費而隱常默具乎其中若於費外別有  
隱而可言則已不得為隱矣程子之云又何疑耶曰  
然則程子所謂鳶飛魚躍子思嚟繫為人處與必有  
事焉而勿正心之意同活潑潑地者何也曰道之流  
行發見於天地之間無所不在在上則鳶之飛而戾  
於天者此也在下則魚之躍而出於淵者此也其在

人則日用之間人倫之際夫婦之所知所能而聖人有所不知不能者亦此也此其流行發見於上下之間者可謂著矣子思於此指而言之惟欲學者於此默而識之則為有以洞見道體之妙而無疑而程子以為子思喫緊為人處者正以示人之意為莫切於此也其曰與必有事焉而勿正心之意同活潑潑地則又以明道之體用流行發見充塞天地亘古亘今雖未嘗有一毫之空闕一息之間斷然其在人而見

諸日用之間者則初不外乎此心故必此心之存而後有以自覺也必有事焉而勿正心活潑潑地亦曰此心之存而全體呈露妙用顯行無所滯礙云爾非必仰而視乎鳶之飛俯而觀乎魚之躍然後可以得之也抑孟子此言固為精密然但為學者集義養氣而發耳至於程子借以為言則又以發明學者洞見道體之妙非但如孟子之意而已也蓋此一言雖若二事然其實則必有事焉半詞之間已盡其意善用

力者苟能於此超然默會則道體之妙已躍如矣何待下句而後足於言耶聖賢特恐學者用力之過而反為所累故更以下句解之欲其雖有所事而不為所累耳非謂必有事焉之外又當別設此念以為正心之防也曰然則其所謂活潑潑地者毋乃釋氏之遺意耶曰此但俚俗之常談釋氏蓋嘗言之而吾亦言之耳彼固不得而專之也况吾之所言雖與彼同而所形容實與彼異若出於吾之所謂則夫道之體

用固無不在然鳶而必戾于天魚而必躍于淵是君  
君臣臣父父子子各止其所而不可亂也若如釋氏  
之云則鳶可以躍淵而魚可以戾天矣是安可同日  
而語哉且子思以夫婦言之所以明人事之至近而  
天理在焉釋氏則舉此而絕之矣又安可同年而語  
哉曰呂氏以下如何曰呂氏分此以上論中以下論  
庸又謂費則常道隱則至道恐皆未安謝氏既曰非  
是極其上下而言矣又曰非指鳶魚而言蓋曰子思

之引此詩姑借二物以明道體無所不在之實非以是為窮其上下之極而形其無所不包之量也又非以是二物專為形其無所不在之體而欲學者之必觀乎此也此其發明程子之意蓋有非一時同門之士所得聞者而又別以夫子與點之意明之則其為說益以精矣但所謂察見天理者俱非本文之訓而於程子之意亦未免小失之耳游氏之說其不可曉者尤多如以良知良能之所自出為道之費則良知



良能者不得為道而在道之外矣又以不可知不可  
能者為道之隱則所謂道者乃無用之長物而人亦  
無所賴於道矣所引天地明察似於彼此文意兩皆  
失之至於所謂七聖皆迷之地則莊生邪遁荒唐之  
語尤非所以論中庸也楊氏以大而化之非智力所  
及為聖人不知不能以祁寒暑雨雖天地不能易其  
節為道之不可能而人所以有憾於天地則於文義  
既有所不通而又曰人雖有憾而道固自若則其失

愈遠矣其曰非體物而不遺者其孰能察之其用體字察字又皆非經文之正意也大抵此章若從諸家以聖人不知不能為隱則其為說之弊必至於此而後已嘗試循其說而體驗之若有以使人神識飛揚眩瞽迷惑而無所底止子思之意其不出此也必矣唯侯氏不知不能之說最為明白但所引聖而不可知者孟子本謂人所不能測耳非此文之意也其他又有大不可曉者亦不足深論也

或問十三章之說子以為以人治人為以彼人之道還治彼人善矣又謂責其所能知能行而引張子之說以實之則無乃流於姑息之論而所謂人之道者不得為道之全也耶曰上章固言之矣夫婦之所能知能行者道也聖人之所不知不能而天地猶有憾者亦道也然自人而言則夫婦之所能知能行者人之所切於身而不可須臾離者也至於天地聖人所不能及則其求之當有漸次而或非日用之所急矣然

則責人而先其切於身之不可離者後其有漸而不  
急者是乃行遠自邇升高自卑之序使其由是而不  
已焉則人道之全亦將可以馴致今必以是為姑息  
而遽欲盡道以責於人吾見其失先後之序違緩急  
之宜人之受責者將至於有所不堪而道之無窮則  
終非一人一日之所能盡也是亦兩失之而已焉爾  
曰子臣弟友之絕句何也曰夫子之意蓋曰我之所  
責乎子之事已者如此而反求乎已之所以事父則

未能如此也所責乎臣之事君者如此而反求乎已  
之所以事君則未能如此也所責乎弟之事已者如  
此而反求乎已之所以事兄則未能如此也所責乎  
朋友之施已者如此而反求乎已之所以先施於彼  
者則未能如此也於是以其所以責彼者自責於庸  
言庸行之間蓋不待求之於他而吾之所以自修之  
則具於此矣今或不得其讀而以父君兄之四字為  
絕句則於文意有所不通而其義亦何所當哉曰諸

說如何曰諸家說論語者多引此章以明一以貫之  
之義說此章者又引論語以釋違道不遠之意一矛  
一盾終不相謀而牽合不置學者蓋深病之及深考  
乎程子之言有所謂動以天者然後知二者之為忠  
恕其迹雖同而所以為忠恕者其心實異非其知德  
之深知言之至其孰能判然如此而無疑哉然盡已  
推已乃忠恕之所以名而正謂此章違道不遠之事  
若動以天而一以貫之則不待盡已而至誠者自無

息不待推已而萬物已各得其所矣曾子之言蓋指其不可名之妙而借其可名之粗以名之學者默識於言意之表則亦足以互相發明而不害其為同也餘說雖多大槩放此推此意以觀之則其為得失自可見矣違道不遠如齊師違穀七里之違非背而去之之謂愚固已言之矣諸說於此多所未合則不察文義而強為之說之過也夫齊師違穀七里而穀人不知則非昔已在穀而今始去之也蓋曰自此而去

以至於穀纔七里耳孟子所云夜氣不足以存則其  
違禽獸不遠矣非謂昔本禽獸而今始違之也亦曰  
自此而去以入於禽獸不遠耳蓋所謂道者當然之  
理而已根於人心而見諸行事不待勉而能也然唯  
盡已之心而推以及人可以得其當然之實而施無  
不當不然則求之愈遠而愈不近矣此所以自是忠  
恕而往以至於道獨為不遠其曰違者非背而去之  
之謂也程子又謂事上之道莫若忠待下之道莫若



恕此則不可曉者若姑以所重言之則似亦不為無理若究其極則忠之與恕初不相離程子所謂要除一箇除不得而謝氏以為猶形影者已可見矣今析為二事而兩用之則是果有無恕之忠無忠之恕而所以事上接下者皆出於強為而不由乎中矣豈忠恕之謂哉是於程子他說殊不相似意其記錄之或誤不然則一時有為言之而非正為忠恕發也張子二說皆深得之但虛者仁之原忠恕與仁俱生之語

若未瑩耳呂氏改本大略不盡經意舊本乃推張子之言而詳實有味但柯猶在外以下為未盡善若易之曰所謂則者猶在所執之柯而不在所伐之柯故執柯者必有睨視之勞而猶以為遠也若夫以人治人則異於是蓋衆人之道止在衆人之身若以其所及知者責其知以其所能行者責其行能改即止不厚望焉則不必睨視之勞而所以治之之則不遠於彼而得之矣忠者誠有是心而不自欺也恕者推待

已之心以及人也推其誠心以及於人則其所以愛  
人之道不遠於我而得之矣至於事父事君事兄交  
友皆以所求乎人者責乎已之所未能則其所以治  
已之道亦不遠於心而得之矣夫四者固皆衆人之  
所能而聖人乃自謂未能者亦曰未能如其所以責  
人者耳此見聖人之心純亦不已而道之體用其大  
天下莫能載其小天下莫能破舜之所以盡事親之  
道必至乎瞽瞍底豫者蓋為此也如此然後屬乎庸

者常道之云則庶乎其無病矣且其曰有餘而盡之則道雖繼而不行又不若游氏所引恥躬不逮為得其文意也謝氏侯氏所論論語之忠恕獨得程子之意但程子所謂天地之不恕亦曰天地之化生生不窮特以氣機闔闢有通有塞故當其通也天地變化草木蕃則有似於恕當其塞也天地閉而賢人隱則有似於不恕耳其曰不恕非若人之閉於私欲而實有伎害之心也謝氏推明其說乃謂天地之有不恕

乃因人而然則其說有未究者蓋若以為人不致中則天地有時而不位人不致和則萬物有時而不育是謂天地之氣因人之不恕而有似於不恕則可若曰天地因人之不恕而實有不恕之心則是彼為人者既以伎心失恕而自絕於天矣為天地者反效其所為以自已其於穆之命也豈不誤哉游氏之說其病尤多至謂道無物我之間而忠恕將以至於忘已忘物則為已違道而猶未遠也是則老莊之遺意而

遠人甚矣豈中庸之旨哉楊氏又謂以人為道則與道二而遠於道故戒人不可以為道如執柯以伐柯則與柯二故睨而視之猶以為遠則其違經背理又有甚焉使經而曰人而為道則遠人故君子不可以為道則其說信矣今經文如此而其說乃如彼既於文義有所不通而推其意又將使道為無用之物人無入道之門而聖人之教人以為道者反為誤人而有害於道是安有此理哉既又曰自道言之則不可

為自求仁言之則忠恕者莫近焉則已自知其有所不通而復為是說以救之然終亦矛盾而無所合是皆流於異端之說不但毫釐之差而已也侯氏固多疎濶其引顏子樂道之說愚於論語已辨之矣至於四者未能之說獨以為若止謂恕已以及人則是聖人將使天下皆無父子君臣矣此則諸家皆所不及蓋近世果有不得其讀而輒為之說曰此君子以己之難克而知天下皆可恕之人也嗚呼此非所謂

將使天下皆無父子君臣者乎侯氏之言於是乎驗矣

或問十四章之說曰此章文義無可疑者而張子所謂當知無天下國家皆非之理者尤為切至呂子說雖不免時有小失然其大體則皆平正慤實而有餘味也游氏說亦條暢而存亡得喪窮通好醜之說尤善但楊氏以反身而誠為不願乎外則本文之意初未及此而詭遇得禽亦非行險倣倖之謂也侯氏所辨



常總默識自得之說甚當近世佛者妄以吾言傳著其說而指意乖刺如此類者多矣甚可笑也但侯氏所以自為說者却有未善若曰識者知其理之如此而已得者無所不足於吾心而已則豈不明白真實而足以服其心乎

或問十五章之說曰章首二句承上章而言道雖無所不在而其進之則有序也其下引詩與夫子之言乃指一事以明之非以二句之義為止於此也諸說惟

呂氏為詳實然亦不察此而反以章首二言發明引詩之意則失之矣

或問鬼神之說其詳奈何曰鬼神之義孔子所以告宰予者見於祭義之篇其說已詳而鄭氏釋之亦已明矣其以口鼻之嚥吸者為魂耳目之精明者為魄蓋指血氣之類以明之程子張子更以陰陽造化為說則其意又廣而天地萬物之屈伸往來皆在其中矣蓋陽魂為神陰魄為鬼是以其人也陰陽合則魂

凝魄聚而有生陰陽判則魂升為神魄降為鬼易大傳所謂精氣為物遊魂為變故知鬼神之情狀者正以明此而書所謂徂落者亦以其升降為言耳若又以其往來者言之則來者方伸而為神往者既屈而為鬼蓋二氣之分實一氣之運故陽主伸陰主屈而錯綜以言亦各得其義焉學者熟玩而精察之如謝氏所謂做題目入思議者則庶乎有以識之矣曰諸說如何曰呂氏推本張子之說尤為詳備但改本有

所屈者不亡一句乃形潰反原之意張子他書亦有是說而程子數辨其非東見錄中所謂不必以既反之氣復為方伸之氣者其類可考也謝氏說則善矣但歸根之云似亦微有反原之累耳游楊之說皆有不可曉者唯妙萬物而無不在一語便是而以其他語考之不知其於是理之實果何如也侯氏曰鬼神形而下者非誠也鬼神之德則誠也按經文本贊鬼神之德之盛如下文所云而結之曰誠之不可揜如

此則是以為鬼神之德所以盛者蓋以其誠耳非以誠自為一物而別為鬼神之德也今侯氏乃析鬼神與其德為二物而以形而上下言之乍讀如可喜者而細以經文事理求之則失之遠矣程子所謂只好隔壁聽者其謂此類也夫曰子之以幹事明體物何也曰天下之物莫非鬼神之所為也故鬼神為物之體而物無不待是而有者然曰為物之體則物先乎氣必曰體物然後見其氣先乎物而言順耳幹猶木

之有榦必先有此而後枝葉有所附而生焉貞之榦  
事亦猶是也

或問十七章之說曰程子張子呂氏之說備矣楊氏所  
辨孔子不受命之意則亦程子所謂非常理者盡之  
而侯氏所推以謂舜得其常而孔子不得其常者尤  
明白也至於顏跖壽夭之不齊則亦不得其常而已  
楊氏乃忘其所以論孔子之意而更援老聃之言以  
為顏子雖夭而不亡者存則反為衍說而非吾儒之

所宜言矣且其所謂不亡者果何物哉若曰天命之性則是古今聖愚公共之物而非顏子所能專若曰氣散而其精神魂魄猶有存者則是物而不化之意猶有滯於冥漠之間尤非所以語顏子也侯氏所謂孔子不得其常者善矣然又以為天於孔子固已培之則不免有自相矛盾處蓋德為聖人者固孔子之所以為裁者也至於祿也位也壽也則天之所當以培乎孔子者而以適丁氣數之衰是以雖欲培之而

有所未能及爾是亦所謂不得其常者何假復為異說以汨之哉

或問十八章十九章之說曰呂氏楊氏之說於禮之節文度數詳矣其間有不同者讀者詳之可也游氏引泰誓武成以為文王未嘗稱王之證深有補於名教然歐陽蘇氏之書亦已有是說矣郊禘呂游不同然合而觀之亦表裏之說也曰昭穆之昭世讀為韶今從本字何也曰昭之為言明也以其南面而向明也



其讀為韶先儒以為晉避諱而改之然禮書亦有作  
召字者則假借而通用耳曰其為向明何也曰此不  
可以空言曉也今且假設諸侯之廟以明之蓋周禮  
建國之神位左宗廟則五廟皆在公宮之東南矣其  
制則孫毓以為外為都宮太祖在北二昭二穆以次  
而南是也蓋太祖之廟始封之君居之昭之北廟二  
世之君居之穆之北廟三世之君居之昭之南廟四  
世之君居之穆之南廟五世之君居之廟皆南向各

有門堂寢室而牆宇四周焉太祖之廟百世不遷自餘四廟則六世之後每一易世而一遷其遷之也新主祔于其班之南廟南廟之主遷於北廟北廟親盡則遷其主於太廟之西夾室而謂之祧凡廟主在本廟之室中皆東向及其祫于太廟之室中則惟太祖東向自如而為最尊之位羣昭之入乎此者皆列於北牖下而南向羣穆之入乎此者皆列於南牖下而北向南向者取其向明故謂之昭北向者取其深遠

故謂之穆蓋羣廟之列則左為昭而右為穆祫祭之位則北為昭而南為穆也曰六世之後二世之主既祧則三世為昭而四世為穆五世為昭而六世為穆乎曰不然也昭常為昭穆常為穆禮家之說有明文矣蓋二世祧則四世遷昭之北廟六世祔昭之南廟矣三世祧則五世遷穆之北廟七世祔穆之南廟矣昭者祔則穆者不遷穆者祔則昭者不動此所以祔必以班尸必以孫而子孫之列亦以為序若武王謂

文王為穆考成王稱武王為昭考則自其始祔而已  
然而春秋傳以管蔡郕霍為文之昭邛晉應韓為武  
之穆則雖其既遠而猶不易也豈其交錯彼此若是  
之紛紛哉曰廟之始立也二世昭而三世穆四世昭  
而五世穆則固當以左為尊而右為卑矣今乃三世  
穆而四世昭五世穆而六世昭是則右反為尊而左  
反為卑矣而可乎曰不然也宗廟之制但以左右為  
昭穆而不以昭穆為尊卑故五廟同為都宮則昭常

在左穆常在右而外有不失其序一世自為一廟則昭不見穆穆不見昭而內有以各全其尊必大祫而會於一室然後序其尊卑之次則凡已毀未毀之主又畢陳而無所易唯四時之祫不陳毀廟之主則高祖有時而在穆其禮未有考焉意或如此則高之止無昭而特設位於祖之西禰之下無穆而特設位於曾之東也與曰然則毀廟云者何也曰春秋傳曰壞廟之道易檐可也改塗可也說者以為將納新主

示有所加耳非盡徹而悉去之也曰然則天子之廟其制若何曰唐之文祖虞之神宗商之七世三宗其詳今不可考獨周制猶有可言然而漢儒之記又已有不同矣謂后稷始封文武受命而王故三廟不毀與親廟四而七者諸儒之說也謂三昭三穆與太祖之廟而七文武為宗不在數中者劉歆之說也雖其數之不同然其位置遷次宜亦與諸侯之廟無甚異者但如諸儒之說則武王初有天下之時后稷為太

祖而組紺居昭之北廟太王居穆之北廟王季居昭  
之南廟文王居穆之南廟猶為五廟而已至成王時  
則組紺桃王季遷而武王祔至康王時則太王桃文  
王遷而成王祔至昭王時則王季桃武王遷而康王  
祔自此以上亦皆且為五廟而桃者藏于太祖之廟  
至穆王時則文王親盡當桃而以有功當宗故別立  
一廟於西北而謂之文世室於是成王遷昭王祔而  
為六廟矣至共王時則武王親盡當桃而亦以有功

當宗故別立一廟於東北謂之武世室於是康王遷  
穆王祔而為七廟矣自是之後則穆之祧者藏於文  
世室昭之祧者藏於武世室而不復藏於太廟矣如  
劉歆之說則周自武王克商即增立二廟于二昭二  
穆之上以祀高圉亞圉如前遞遷至于懿王而始立  
文世室於三穆之上至孝王時始立武世室於三昭  
之上此為少不同耳曰然則諸儒與劉歆之說孰為  
是曰前代說者多是劉歆愚亦意其或然也曰祖功



宗德之說尚矣而程子獨以為如此則是為子孫者得擇其先祖而祭之也子亦嘗考之乎曰商之三宗周之世室見於經典皆有明文而功德有無之實天下後世自有公論若必以此為嫌則秦政之惡夫子議父臣議君而除謚法者不為過矣且程子晚年嘗論本朝廟制亦謂太祖太宗皆當為百世不遷之廟以此而推則知前說若非記者之誤則或出於一時之言而未必其終身之定論也曰然則大夫士之制

柰何曰大夫三廟則視諸侯而殺其二然其太祖昭穆之位猶諸侯也適士二廟則視大夫而殺其一官師一廟則視大夫而殺其二然其門堂寢室之備猶大夫也曰廟之為數降殺以兩而其制不降何也曰降也天子之山節藻梲復廟重檐諸侯固有所不得為者也諸侯之黜陟斲磬大夫有不得為者矣大夫之倉楹斲桷士又不得為矣曷為而不降哉獨門堂寢室之合然後可名於宮則其制有不得而殺耳蓋

由命士以上父子皆異宮生也異宮而死不得異廟則有不得盡其事生事存之心者是以不得而降也曰然則後世公私之廟皆為同堂異室而以西為上者何也曰由漢明帝始也夫漢之為禮略矣然其始也諸帝之廟皆自營之各為一處雖衍其都宮之制昭穆之位不復如古然猶不失其獨專一廟之尊也至於明帝不知禮義之正而務為抑損之私遺詔藏主於光烈皇后更衣別室而其臣子不敢有加焉魏

晉循之遂不能革而先王宗廟之禮始盡廢矣降及近世諸侯無國大夫無邑則雖同堂異室之制猶不能備獨天子之尊可以無所不致顧乃梏於漢明非禮之禮而不得以致其備物之孝蓋其別為一室則深廣之度或不足以陳鼎俎而其合為一廟則所以尊其太祖者既褻而不嚴所以事其親廟者又厭而不尊是皆無以盡其事生事存之心而當世宗廟之禮亦為虛文矣宗廟之禮既為虛文而事生事存之

心有終不能以自已者於是原廟之儀不得不盛然亦至於我朝而後都宮別殿前門後寢始略如古者宗廟之制是其沿襲之變不惟窮鄉賤士有不得聞而自南渡之後故都淪沒權宜草創無復舊章則雖朝廷之上禮官博士老師宿儒亦莫有能知其原者幸而或有一二知經學古之人乃能私議而竊歎之然於前世則徒知譏孝惠之飾非責叔孫通之無禮而於孝明之亂命與其臣子之苟從則未有正其罪

者於今之世則又徒知論其惑異端徇流俗之為陋而不知本其事生事存之心有不得伸於宗廟者是以前不自致於此也抑嘗觀於陸佃之譏而知神祖之嘗有意於此然而考於史籍則未見其有紀焉若曰未及營表故不得書則後日之秉史筆者即前日承詔討論之臣也所宜深深探遺旨特書總序以昭示來世而略無一詞以及之豈天未欲使斯人者復見二帝三王之盛故尼其事而嗇其傳耶嗚呼惜哉

然陸氏所定昭穆之次又與前說不同而張琥之議庶幾近之讀者更詳考之則當知所擇矣

或問二十章蒲盧之說何以廢舊說而從沈氏也曰蒲盧之為果羸他無所考且於上下文義亦不甚通惟沈氏之說乃與地道敏樹之云者相應故不得不從耳曰沈說固為善矣然夏小正十月玄雉入於淮為蜃而其傳曰蜃者蒲盧也則似亦以蒲盧為變化之意而舊說未為無所據也曰此亦彼書之傳文耳

其他蓋多穿鑿不足據信疑亦出於後世迂儒之筆  
或反取諸此而附合之決非孔子所見夏時之本文也  
且又以蜃為蒲盧則不應二物而一名若以蒲盧為  
變化則又不必解為果贏矣况此等瑣碎既非大義  
所繫又無明文可證則姑闕之其亦可也何必詳考  
而深辨之耶曰達道達德有三知三行之不同而其  
致則一何也曰此氣質之異而性則同也生而知者  
生而神靈不待教而於此無不知也安而行之安於



義理不待習而於此無所拂也此人之稟氣清明賦  
質純粹天理渾然無所虧喪者也學而知者有所不  
知則學以知之雖非生知而不待困也利而行者真  
知其利而必行之雖有未安而不待勉也此得清之  
多而未能無蔽得粹之多而未能無雜天理小失而  
能亟反之者也困而知者生而不明學而未達困心  
衡慮而後知之者也勉強而行者不獲所安未知其  
利勉力強矯而行之者也此則昏蔽駁雜天理幾亡

久而後能反之者也此三等者其氣質之稟亦不同  
矣然其性之本則善而已故及其知之而成功也則  
其所知所至無少異焉亦復其初而已矣曰張子呂  
楊侯氏皆以生知安行為仁學知利行為知困知勉  
行為勇其說善矣子之不從何也曰安行可以為仁  
矣然生而知之則知之大而非仁之屬也利行可以  
為知矣然學而知之則知之次而非知之大也且上  
文三者之目固有次序而篇首諸章以舜明知以回

明仁以子路明勇其語知也不卑矣夫豈專以學知利行者為足以當之乎故今以其分而言則三知為智三行為仁所以勉而不息以至於知之成功之一為勇以其等而言則以生知安行者主於知而為智學知利行者主於行而為仁困知勉行者主於強而為勇又通三近而言則又以三知為智三行為仁而三近為勇之次則亦庶乎其曲盡也歟曰九經之說奈何曰不一其內則無以制其外不齊其外則無以

養其內靜而不存則無以立其本動而不察則無以勝其私故齊明盛服非禮不動則內外交養而動靜不違所以為修身之要也信讒邪則任賢不專徇貨色則好賢不篤賈捐之所謂後宮盛色則賢者隱微佞人用事則諍臣杜口蓋持衡之勢此重則彼輕理固然矣故去讒遠色賤貨而一於貴德所以為勸賢之道也親之欲其貴愛之欲其富兄弟婚姻欲其無相遠故尊位重祿同其好惡所以為勸親親之道也

大臣不親細事則以道事君者得以自盡故官屬衆  
盛足任使令所以為勸大臣之道也盡其誠而恤其  
私則士無仰事俯育之累而樂趨事功故忠信重祿  
所以為勸士之道也人情莫不欲逸亦莫不欲富故  
時使薄斂所以為勸百姓之道也日省月試以程其  
能既稟稱事以償其勞則不信度作淫巧者無所容  
情者勉而能者勸矣為之授節以送其往待以委積  
以迎其來因能授任以嘉其善不強其所不欲以矜

其不能則天下之旅皆悅而願出於其塗矣無後者  
續之已滅者封之治其亂使上下相安持其危使大  
小相恤朝聘有節而不勞其力貢賜有度而不匱其  
財則天下諸侯皆竭其忠力以蕃衛王室而無倍畔  
之心矣凡此九經其事不同然總其實不出乎修身  
尊賢親親三者而已敬大臣體羣臣則自尊賢之等  
而推之也子庶民來百工柔遠人懷諸侯則自親親  
之殺而推之也至於所以尊賢而親親則又豈無所

自而推之哉亦曰修身之至然後有以各當其理而無所悖耳曰親親而不言任之以事者何也曰此親親尊賢並行不悖之道也苟以親親之故不問賢否而輕屬任之不幸而或不勝焉治之則傷恩不治則廢法是以富之貴之親之厚之而不曰任之以事是乃所以親愛而保全之也若親而賢則自當置之大臣之位而尊之敬之矣豈但富貴之而已哉觀於管蔡監商而周公不免於有過及其致辟之後則惟康

叔明季相與夾輔王室而五叔者有土而無官焉則  
聖人之意亦可見矣曰子謂信任大臣而無以間之  
故臨事而不眩使大臣而賢也則可其或不幸而有  
趙高朱异虞世基李林甫之徒焉則鄒陽所謂偏聽  
生奸獨任成亂范雎所謂妒賢嫉能御下蔽上以成  
其私而主不覺悟者亦安得而不慮耶曰不然也彼  
其所以至此正坐不知此經之義而然耳使其明於  
此義而能以修身為本則固視明聽聰而不可欺以



賢否矣能以尊賢為先則其所置以為大臣者必不  
雜以如是之人矣不幸而或失之則亦亟求其人以  
易之而已豈有知其必能為姦以敗國顧猶置之犬  
臣之位使之姑以奉行文書為職業而又恃小臣之  
察以防之哉夫勞於求賢而逸於得人任則不疑而  
疑則不任此古之聖君賢相所以誠意交孚兩盡其  
道而有以共成正大光明之業也如其不然吾恐上  
之所以猜防畏備者愈密而其為眩愈甚下之所以

欺罔蒙蔽者愈巧而其為害愈深不幸而臣之姦遂  
則其禍固有不可勝言者幸而主之威勝則夫所謂  
偏聽獨任御下蔽上之姦將不在於大臣而移於左  
右其為國家之禍尤有不可勝言者矣嗚呼危哉曰  
子何以言柔遠人之為無忘賓旅也曰以其列於懷  
諸侯之上也舊說以為蕃國之諸侯則以遠先近而  
非其序書言柔遠能邇而又言蠻夷率服則所謂柔  
遠亦不止謂服四夷也况愚所謂授節委積者比長

遺人懷方氏之官掌之於經有明文耶曰楊氏之說有虛器之云者二而其指意所出若有不同者焉何也曰固也是其前段主於誠意故以為有法度而無誠意則法度為虛器正言以發之也其後段主於格物故以為若但知誠意而不知治天下國家之道則是直以先王之典章文物為虛器而不之講反語以詰之也此其不同審矣但其下文所引明道先生之言則又若主於誠意而與前段相應其於本段上文

之意則雖亦可以宛轉而說合之然終不免於迂回而難通也豈記者之誤耶然楊氏他書首尾衡決亦多有類此者殊不可曉也曰所謂前定何也曰先立乎誠也先立乎誠則言有物而不躡矣事有實而不困矣行有常而不疲矣道有本而不窮矣諸說惟游氏誠定之云得其要張子以精義入神為言是則所謂明善者也曰在下獲上明善誠身之說奈何曰夫在下位而不獲乎上則無以安其位而行其志故民

不可治然欲獲乎上又不以諛悅取容也其道在信  
乎友而已蓋不信乎友則志行不孚而名譽不聞故  
上不見知然欲信乎友又不可以便佞苟合也其道  
在悅乎親而已蓋不悅乎親則所厚者薄而無所不  
薄故友不見信然欲順乎親又不可以阿意曲從也  
其道在誠乎身而已蓋反身不誠則外有事親之禮  
而內無愛敬之實故親不見悅然欲誠乎身又不可  
以襲取強為也其道在明乎善而已蓋不能格物致

知以真知至善之所在則好善必不能如好好色惡惡必不能如惡惡臭雖欲勉焉以誠其身而身不可得而誠矣此必然之理也故夫子言此而其下文即以天道人道擇善固執者繼之蓋擇善所以明善固執所以誠身擇之之明則大學所謂物格而知至也執之之固則大學所謂意誠而心正身修也知至則反諸身者將無一毫之不實意誠心正而身修則順親信友獲上治民將無所施而不利而達道達德九

經凡事亦一以貫之而無遺矣曰諸說如何曰此章之說雖多然亦無大得失惟楊氏反身之說為未安耳蓋反身而誠者物格知至而反之於身則所明之善無不實有如前所謂如惡惡臭如好好色者而其所以行自無內外隱顯之殊耳若知有未至則反之而不誠者多矣安得直謂但能反求諸身則不待求之於外而萬物之理皆備於我而無不誠哉况格物之功正在即事即物而各求其理今乃反欲離去事物

而專務求之於身尤非大學之本意矣曰誠之為義其詳可得而聞乎曰難言也姑以其名義言之則真實無妄之云也若事理之得此名則亦隨其所指之大小而皆有取乎真實無妄之意耳蓋以自然之理言之則天地之間惟天理為至實而無妄故天理得誠之名若所謂天之道鬼神之德是也以德言之則有生之類惟聖人之心為至實而無妄故聖人得誠之名若所謂不勉而中不思而得者是也至於隨事



而言則一念之實亦誠也一言之實亦誠也一行之實亦誠也是其大小雖有不同然其義之所歸則未始不在於實也曰然則天理聖人之所以若是其實者何也曰一則純二則雜純則誠雜則妄此常物之大情也夫天之所以為天也冲漠無朕而萬理兼該無所不具然其為體則一而已矣未始有物以雜之也是以無聲無臭無思無為而一元之氣春夏秋冬晝夜昏明百千萬年未嘗有一息之繆天下之物洪

纖巨細飛潛動植亦莫不各得其性命之正以生而  
未嘗有一毫之差此天理之所以為實而不妄者也  
若夫人物之生性命之正固亦莫非天理之實但以  
氣質之偏口鼻耳目四肢之好得以蔽之而私欲生  
焉是以當其惻隱之發而伎害雜之則所以為仁者  
有不實矣當其羞惡之發而貪昧雜之則所以為義  
者有不實矣此常人之心所以雖欲勉於為善而內  
外隱顯常不免於二致其甚至於詐偽欺罔而卒墮

於小人之歸則以其二者雜之故也惟聖人氣質清  
純渾然天理初無人欲之私以病之是以仁則表裏  
皆仁而無一毫之不仁義則表裏皆義而無一毫之  
不義其為德也固舉天下之善而無一事之或遺而  
其為善也又極天下之實而無一毫之不滿此其所  
以不勉不思從容中道而動容周旋莫不中節也曰  
然則常人未免於私欲而無以實其德者奈何曰聖  
人固已言之亦曰擇善而固執之耳夫於天下之事

皆有以知其如是為善而不能不為知其如是為惡而不能不去則其為善去惡之心固已篤矣於是而又加以固執之功雖其不睹不聞之間亦必戒謹恐懼而不敢懈則凡所謂私欲者出而無所施於外入而無所藏於中自將消磨泯滅不得以為吾之病而吾之德又何患於不實哉是則所謂誠之者也曰然則大學論小人之陰惡陽善而以誠於中者目之何也曰若是者自其天理之大體觀之則其為善也誠

虛矣自其人欲之私分觀之則其為惡也何實如之  
而安得不謂之誠哉但非天理真實無妄之本然則  
其誠也適所以虛其本然之善而反為不誠耳曰諸  
說如何曰周子至矣其上章以天道言其下章以人  
道言愚於通書之說亦既略言之矣程子无妄之云  
至矣其他說亦各有所發明讀者深玩而默識焉則  
諸家之是非得失不能出乎此矣曰學問思辨亦有  
序乎曰學之博然後有以備事物之理故能參伍之

以得所疑而有問問之審然後有以盡師友之情故  
能反復之以發其端而可思思之慎則精而不雜故  
能有所自得而可以施其辨辨之明則斷而不差故  
能無所疑惑而可以見於行行之篤則凡所學問思  
辨而得之者又皆必踐其實而不為空言矣此五者  
之序也曰呂氏之說之詳不亦善乎曰呂氏此章最  
為詳實然深考之則亦未免乎有病蓋君子之於天  
下必欲無一理之不通無一事之不能故不可以不

學而其學不可以不博及其積累而貫通焉然後有以深造乎約而一以貫之非其博學之初已有造約之心而姑從事於博以為之地也至於學而不能無疑則不可以不問而其問也或粗略而不審則其疑不能盡決而與不問無以異矣故其問之不可以不審若曰成心亡而後可進則是疑之說也非疑而問問而審之說也學也問也得於外者也若專恃此而不反之心以驗其實則察之不精信之不篤而守之

不固矣故必思索以精之然後心與理熟而彼此為一然使其思也或太多而不專則亦泛濫而無益或太深而不止則又過苦而有傷皆非思之善也故其思也又必貴於能慎非獨為反之於身知其為何事何物而已也其餘則皆得之而所論變化氣質者尤有功也曰何以言誠為此篇之樞紐也曰誠者實而已矣天命云者實理之原也性其在物之實體道其當然之實用而教也者又因其體用之實而品節之



也不可離者此理之實也隱之見微之顯實之存亡而不可揜者也戒謹恐懼而慎其獨焉所以實乎此理之實也中和云者所以狀此實理之體用也天地位萬物育則所以極此實理之功效也中庸云者實理之適可而平常者也過與不及不見實理而妄行者也費而隱者言實理之用廣而體微也鳶飛魚躍流動充滿夫豈無實而有是哉道不遠人以下至於大舜文武周公之事孔子之言皆實理應用之當然

而鬼神之不可揜則又其發見之所以然也聖人於此因以其無一毫之不實而至於如此之盛其示人也亦欲其必以其實而無一毫之偽也蓋自然而實者天也必期於實者人而天也誠明以下累章之意皆所以反復乎此而語其所以至於正大經而立大本參天地而贊化育則亦真實無妄之極功也卒章尚絅之云又本其務實之初心而言也內省者謹獨克己之功不愧屋漏者戒謹恐懼而無己可克之事

皆所以實乎此之序也時靡有爭變也百辟刑之化  
也無聲無臭又極乎天命之性實理之原而言也蓋  
此篇大指專以發明實理之本然欲人之實此理而  
無妄故其言雖多而其樞紐不越乎誠之一言也嗚  
呼深哉

四書或問卷四

欽定四庫全書

四書或問卷五

宋 朱子 撰

中庸

第二十一章至第三十三章

或問誠明之說曰程子諸說皆學者所傳錄其以內外  
道行為誠明似不親切唯先明諸心一條以知語明  
以行語誠為得其訓乃顏子好學論中語而程子之

手筆也亦可以見彼記錄者之不能無失矣張子蓋以性教分為學之兩塗而不以論聖賢之品第故有由誠至明之語程子之辨雖已得之然未究其立言本意之所以失也其曰誠即明也恐亦不能無誤呂氏性教二字得之而於誠字以至簡至易行其所無事為說則似未得其本旨也且於性教皆以至於實然不易之地為言則至於云者非所以言性之事而不易云者亦非所以申實然之說也然其過於游

楊則遠矣

或問至誠盡性諸說如何曰程子以盡己之忠盡物之信為盡其性蓋因其事而極言之非正解此文之意今不得而錄也其論贊天地之化育而曰不可以贊助言論窮理盡性以至於命而曰即窮理便是至於命則亦若有可疑者蓋嘗竊論之天下之理未嘗不一而語其分則未嘗不殊此自然之勢也蓋人生天地之間稟天地之氣其體即天地之體其心即天地

之心以理而言是豈有二物哉故凡天下之事雖若人之所為而其所以為之者莫非天地之所為也又况聖人純於義理而無人欲之私則其所以代天而理物者乃以天地之心而贊天地之化尤不見其有彼此之間也若以其分言之則天之所為固非人之所及而人之所為又有天地之所不及者其事固不同也但分殊之狀人莫不知而理之一致多或未察故程子之言發明理一之義多而及於分殊者少蓋



抑揚之勢不得不然然亦不無少失其平矣唯其所  
謂只是一理而天人所為各自有分乃為全備而不  
偏而讀者亦莫之省也至於窮理至命盡人盡物之  
說則程張之論雖有不同然亦以此而推之則其說  
初亦未嘗甚異也蓋以理言之則精粗本末初無二  
致固不容有漸次當如程子之論若以其事而言則  
其親疎遠近淺深先後又不容於無別當如張子之  
言也呂游楊說皆善而呂尤確實楊氏萬物皆備云

者又前章格物誠身之意然於此論之則反求於身又有所不足言也胥失之矣

或問致曲之說曰人性雖同而氣稟或異自其性而言之則人自孩提聖人之質悉已完具以其氣而言之則惟聖人為能舉其全體而無所不盡上章所言至誠盡性是也若其次則善端所發隨其所稟之厚薄或仁或義或孝或弟而不能同矣自非各因其發見之偏一一推之以至乎其極使其薄者厚而異者同

則不能有以貫通乎全體而復其初即此章所謂致  
曲而孟子所謂擴充其四端者是也程子之言大意  
如此但其所論不詳且以由基之射為說故有疑於  
專務推致其氣質之所偏厚而無隨事用力悉有衆  
善之意又以形為參前倚衡所立卓爾之意則亦若  
以為已之所自見而無與於人也豈其記者之略而  
失之與至於明動變化之說則無以易矣若張子之  
說以明為兼照動為從義變為通變化為無滯則皆

以其進乎內者言之失其旨矣蓋進德之序由中達外乃理之自然如上章之說亦自己而人自人而物各有次序不應專於內而遺其外也且夫進乎內之節目亦安得如是之繁促哉游氏說亦得之但說致曲二字不同非本意耳楊氏既以光輝發外為明矣而又引明則誠矣則似以明為通明之明既以鶴鳴子和為動矣而又曰化非學問篤行所及則似以化為大而化之之化此其文意不相承續而於明動之

間本文之外別生無物不誠一節以就至誠動物之意尤不可曉今固不能盡錄然亦不可不辨也

或問至誠如神之說曰呂氏得之矣其論動乎四體為威儀之則者尤為確實游氏心合於氣氣合於神之云非儒者之言也且心無形而氣有物若之何而反以是為妙哉程子用便近二之論蓋因異端之說如蜀山人董五經之徒亦有能前知者故就之而論其優劣非以其不用而不知者為真可貴而賢於至誠

之前知也至誠前知乃因其事理朕兆之已形而得之如所謂不逆詐不億不信而常先覺者非有術數推驗之煩意想測度之私也亦何害其為一哉

或問二十五章之說曰自成自道如程子說乃與下文相應游楊皆以無待而然論之其說雖高然於此為無所當且又老莊之遺意也誠者物之終始不誠無物之義亦惟程子之言為至當然其言太略故讀者或不能曉請得而推言之蓋誠之為言實而已矣然

此篇之言有以理之實而言者如曰誠不可揜之類  
是也有以心之實而言者如曰反身不誠之類是也  
讀者各隨其文意之所指而尋之則其義各得矣所  
謂誠者物之終始不誠無物者以理言之則天地之  
理至實而無一息之妄故自古及今無一物之不實  
而一物之中自始至終皆實理之所為也以心言之  
則聖人之心亦至實而無一息之妄故從生至死無  
一事之不實而一事之中自始至終皆實心之所為

也此所謂誠者物之終始者然也苟未至於聖人而  
其本心之實者猶未免於間斷則自其實有是心之  
初以至未有間斷之前所為無不實者及其間斷則  
自其間斷之後以至未相接續之前凡所云為皆無  
實之可言雖有其事亦無以異於無有矣如曰三月  
不違則三月之間所為皆實而三月之後未免於無  
實蓋不違之終始即其事之終始也日月至焉則至  
此之時所為皆實而去此之後未免於無實蓋至焉



之終始即其物之終始也是則所謂不誠無物者然也。以是言之則在天者本無不實之理故凡物之生於理者必有是理方有是物未有無其理而徒有不實之物者也在人者或有不實之心故凡物之出於心者必有是心之實乃有是物之實未有無其心之實而能有其物之實者也。程子所謂徹頭徹尾者蓋如此其餘諸說大抵皆知誠之在天為實理而不知其在人為實心是以為說太高而往往至於交互差

錯以失經文之本意正猶知愛之不足以盡仁而凡言仁者遂至於無事之可訓其亦誤矣呂氏所論子貢子思所言之異亦善而猶有未盡者蓋子貢之言主於知子思之言主於行故各就其所重而有賓主之分亦不但為成德入德之殊而已也楊氏說物之終始直以天行二字為解蓋本於易終則有始天行也之說假借依託無所發明楊氏之言蓋多類此最說經之大病也又謂誠則形而有物不誠則輟而無

物亦未安誠之有物蓋不待形而有不誠之無物亦不待其輟而後無也其曰猶四時之運已則成物之功廢蓋亦輟而後無之意而又直以天無不實之理喻夫人有不實之心其取譬也亦不親切矣彼四時之運夫豈有時而已者哉

或問二十六章之說曰此章之說最為繁雜如游楊無息不息之辨恐未然若如其言則不息則从以下至何地位然後為無息耶游氏又以得一形容不二之

意亦假借之類也字雖密而意則疎矣呂氏所謂不  
已其命不已其德意雖無爽而語亦有病蓋天道聖  
人之所以不息皆實理之自然雖欲已之而不可得  
今曰不已其命不已其德則是有意於不已而非所  
以明聖人天道之自然矣又以積天之昭昭以至於  
無窮譬夫人之充其良心以至於與天地合德意則  
甚善而此章所謂至誠無息以至於博厚高明乃聖  
人久於其道而天下化成之事其所積而成者乃其

氣象功效之謂若鄭氏所謂至誠之德著於四方者是已非謂在已之德亦待積而後成也故章末引文王之詩以證之夫豈積累漸次之謂哉若如呂氏之說則是因無息然後至於誠由不已然後純於天道也失其旨矣楊氏動以天故無息之語甚善其曰天地之道聖人之德無二致焉顧方論聖人之事而又曰天地之道可一言而盡蓋未覺其語之更端耳至謂天之所以為天文王之所以為文皆原於不已則

亦猶呂氏之失也大抵聖賢之言內外精粗各有攸當而無非極致近世諸儒乃或不察乎此而於其外者皆欲引而納之於內於其粗者皆或推而致之於精若致曲之明動變化此章之博厚高明蓋不勝其煩碎穿鑿而於其本指失之愈遠學者不可以不察也

或問二十七章之說曰程張備矣張子所論逐句為義一條甚為切於文義故呂氏因之然須更以游楊二

說足之則其義始備耳游氏分別至道至德為得之  
唯優優大哉之說為未善而以無方無體離形去智  
為極高明之意又以人德地德天德為德性廣大高  
明之分則其失愈遠矣楊氏之說亦不可曉蓋道者  
自然之路德者人之所得故禮者道體之節文必其  
人之有德然後乃能行之也今乃以禮為德而欲以  
凝夫道則既誤矣而又曰道非禮則蕩而無止禮非  
道則梏於儀章器數之末而有所不行則是所謂道

者乃為虛無恍惚元無準則之物所謂德者又不足以疑道而反有所待於道也其諸老氏之言乎誤益甚矣溫故知新敦厚崇禮諸說但以二句相對明其不可偏廢大意固然然細分之則溫故然後有以知新而溫故又不可不知新敦厚然後有以崇禮而敦厚又不可不崇禮此則諸說之所遺也大抵此五句承章首道體大小而言故一句之內皆具大小二意如德性也廣大也高明也故也厚也道之大也問學



也精微也中庸也新也禮也道之小也尊之道之致之盡之極之道之溫之知之敦之崇之所以修是德而凝是道也以其於道之大小無所不體故居上居下在治在亂無所不宜此又一章之通旨也

或問子思之時周室衰微禮樂失官制度不行於天下久矣其曰同軌同文何耶曰當是之時周室雖衰而人猶以為天下之共主諸侯雖有不臣之心然方彼此爭雄不能相尚下及六國之未亡猶未有能更姓

改物而定天下於一者也則周之文軌孰得而變之  
哉曰周之車軌書文何以能若是其必同也曰古之  
有天下者必改正朔易服色殊徽號以新天下之耳  
目而一其心志若三代之異尚其見於書傳者詳矣  
軌者車之轍迹也周人尚輿而制作之法領於冬官  
其輿之廣六尺六寸故其轍迹之在地者相距之間  
廣狹如一無有遠邇莫不齊同況為車者必合乎此  
然後可以行乎方內而無不通不合乎此則不惟有

司得以討之而其行於道路自將偏倚机隄而跬步  
不前亦不待禁而自不為矣古語所謂閉門造車出  
門合轍蓋言其法之同而春秋傳所謂同軌畢至者  
則以言其四海之內政令所及者無不來也文者書  
之點畫形象也周禮司徒敎民道藝而書居其一又  
有外史掌達書名於四方而大行人之法則又每九  
歲而一諭焉其制度之詳如此是以雖其末流海內  
分裂而猶不得變也必至於秦滅六國而其號令法

制有以同於天下然後車以六尺為度書以小篆隸書為法而周制始改爾孰謂子思之時而遽然哉

或問二十九章之說曰三重諸說不同雖程子亦因鄭註然於文義皆不通唯呂氏一說為得之耳至於上下焉者則呂氏亦失之惜乎其不因上句以推之而為是矛盾也曰然則上焉者以時言下焉者以位言宜不得為一說且又安知下焉者之不為霸者事耶曰以王天下者而言則位不可以復上矣以霸者之

事而言則其善又不足稱也亦何疑哉曰此章文義多近似而若可以相易者其有辨乎曰有三王以迹言者也故曰不謬言與其已行者無所差也天地以道言者也故曰不悖言與其自然者無所拂也鬼神無形而難知故曰無疑謂幽有以驗乎明也後聖未至而難料故曰不惑謂遠有以驗乎近也動舉一身兼行與言而言之也道者人所共由兼法與則而言之也法謂法度人之所當守也則謂準則人之所取

正也遠者悅其德之廣被故企而慕之近者習其行之有常故久而安之也

或問小德大德之說曰以天地言之則高下散殊者小德之川流於穆不已者大德之敦化以聖人言之則物各付物者小德之川流純亦不已者大德之敦化以此推之可見諸說之得失矣曰子之所謂兼內外該本末而言者何也曰是不可以一事言也姑以夫子已行之迹言之則由其書之有得夏時贊周易也

由其行之有不時不食也迅雷風烈必變也以及於  
仕止久速之皆當其可也而其所以律天時之意可  
見矣由其書之有序禹貢述職方也由其行之有居  
魯而逢掖也居宋而章甫也以及於用舍行藏之所  
遇而安也而其襲水土之意可見矣若因是以推之  
則古先聖王之所以迎日推策頒朔授民而其大至  
於禪授放伐各以其時者皆律天時之事也其所以  
體國經野方設居方而其廣至於昆蟲草木各遂其

性者皆襲水土之事也使夫子而得邦家也則亦何  
歉於是哉

或問至聖至誠之說曰楊氏以聰明睿知為君德者得  
之而未盡其實裕以下則失之蓋聰明睿知者生知  
安行而首出庶物之資也容執敬別則仁義禮智之  
事也經綸以下諸家之說亦或得其文義但不知經  
綸之為致和立本之為致中知化之為窮理以至於  
命且上於至誠者無所繫下於焉有所倚者無所屬



則為不得其綱領耳游氏以上章為言至聖之德下章為言至誠之道者得之其說自德者其用以下皆善

或問卒章之說曰承上三章既言聖人之德而極其盛矣子思懼夫學者求之於高遠玄妙之域輕自大而反失之也故反於其至近者而言之以示入德之方欲學者先知用心於內不求人知然後可以慎獨誠身而馴致乎其極也君子篤恭而天下平而其所以

平者無聲臭之可尋此至誠盛德自然之效而中庸之極功也故以是而終篇焉蓋以一篇而論之則天命之性率性之道修道之教與夫天地之所以位萬物之所以育者於此可見其實德以此章論之則所謂淡而不厭簡而文溫而理知遠之近知風之自知微之顯者於此可見其成功皆非空言也然其所以入乎此者則無他焉亦曰反身以慎獨而已矣故首章已發其意此章又申明而極言之其旨深哉其曰

不顯亦充尚絅之心以至其極耳與詩之訓義不同  
蓋亦假借而言若大學敬止之例也諸說如何曰程  
子至矣呂氏既失其章旨又不得其綱領條貫而於  
文義尤多未當如此章承上文聖誠之極致而反之  
以本乎下學之初心遂推言之以至其極而後已也  
而以為皆言德成反本之事則既失其章旨矣此章  
凡八引詩自衣錦尚絅以至不顯惟德凡五條始學  
成德疎密淺深之序也自不大聲色以至無聲無臭

凡三條皆所以贊夫不顯之德也今以不顯惟德通前三義而并言之又以後三條者亦通為進德工夫淺深次第則又失其條理矣至以知風之自為知見聞動作皆由心出以知微之顯為知心之精微明達暴著以不動而敬不言而信為人敬信之以貨色親長達諸天下為篤恭而天下平以德為誠之事而猶有聲色至於無聲無臭然後誠一於天則又文義之未當者然也然近世說者乃有深取其知風之自

之說而以為非程夫子不能言者蓋習於佛氏作用是性之談而不察夫了翁序文之誤耳學之不講其陋至此亦可憐也游氏所謂無藏於中無交於物泊然純素獨與神明居所謂離人而立於獨者皆非儒者之言不失足於人不失色於人不失口於人則又審於接物之事而非簡之謂也其論三知未免牽合之病其論德輶如毛以下則其失與呂氏同楊氏知風之自與呂氏舊本之說略同而其取證又皆太遠

要當參取呂氏改本去其所謂見聞者而益以言語之得失動作之是非皆知其有所從來而不可不謹則庶乎其可耳以德輔如毛為有德而未化則又呂游之失也侯氏說多踈濶惟以此章為再敘入德成德之序者獨為得之也

四書或問卷五